


Verbi è nomi

U nome

I nomi formanu una classe gramaticale.

- Venenu à spessu priciduti da un ditarminante (**u** sole, **a** Corsica, **stu** zitellu, **a to** casa...) è priciduti o suvitati da un agettivu (**stu bellu** zitellu, **a robba bona**...).
- Si face u spiccu trà :
 - i nomi cumuni, chì insegnanu essari vivi, ogetti, lochi, idee... : *un omu, sta cuchjara, u so paese, u curagiu...*
 - i nomi proprii, chì insegnanu un essere o un locu unicu. Principianu cù una maiuscula, è parechji si scrivenu senza ditarminante : *Lisandra, Bastia, u Taravu...*
- U nome vene caratterizatu da :
 - u so **genaru**, maschile (*u nasu, u portu, u pane...*) o feminile (*a luna, a porta, a notte...*)
 - u so **numaru**, singulare (*u maestru, a maestra, quellu ponte...*) o plurale (*i maestri, e maestre, quelli ponti...*).

1 Classifichighja issi nomi in a valigia bona.



2 Scrivi sei nomi cumuni à u singulare, chì trè sianu maschili è trè sianu fiminile. Òn ti scurdà d'assucià lu à un ditarminante.

.....

3 Issi nomi ch'è tù ai trovu, scrivi li avà à u plurale. ★

.....

U gruppu numinale

Ind'una frasa, u **nome** si cunnosce faciule chì à spessu hè u **nùcleu** d'un **gruppu numinale** cù altre parolle chì l'accompagnanu.

U più à spessu, u gruppu numinale hè furmatu cù u nome :

- prcidutu da un **ditarminante** : u brocciu, sta sera, u nostru collegghju...
- prcidutu o suvitatu da un/parechji **aggettivu/i** : a vechja cità, stu zitellu cuntentu, una bella camisgia rossa...
- suvitatu da un **cumplementu di nome** (un antru nome o gruppu numinale intruduttu da **di** o **à**) :
u saccu di Cristina, a bocca à Sorru, a chjave di a to casa...

1 E parolle in grassu sò nomi chì sò nùclei di gruppi numinali. Sottuligneghja u gruppu numinale sanu sanu.

Sta **mane**, **Lisandra** hè ghjunta cù un billissimu **cappellu** neru. Ma si hè scurdada di u so **libru** di matematiche. Òn face nulla ! U **prufissore** li busca un vechju **libru** mezu stracciatu in l'**armariu** di a sala.

Qualessu hè u nome chì ùn hè micca accompagnatu ? :

.....

2 Forma tù un gruppu numinale partendu da ogni parolla.

Case :

Ghjattu :

Lingua :

Vittura :



U verbu

- I verbi formanu una classe gramaticale.
- U verbu hè l'elementu di primura di a frasa : senza quellu ùn sapemu micca ciò ch'ellu face o ciò ch'ellu risente u sugettu di a frasa. Ma face di più cà cusì : ci dà infurmazione nant'à a parsona, u tempu è u modu.
- L'inseme di e forme ch'ellu piglia un verbu si chjama **a cunghjugazione**.

1 À mezu à ste frase, qualesse ùn ti parenu ghjuste ?

	ghjusta	falsa
Vanessa manghja a cicculata.		
U ghjattu daretu à u topu.		
Ghjulia parla cù a minnana.		
U tempu goffu sta mane.		
O fratè, quandu à u sinemà ?		
Oghje ùn si vede u sole.		

In e frase chì ti parenu false, chì elementu manca par ch'elle sianu ghjuste ?

.....

Cerca di cumplittà e frase false, da ch'elle sianu ghjuste :

.....

.....

.....

2 Leghji u testu è empia u tavulellu.

Anna chjama a so amica Letizia.

Salute o Leti... lè, **facciu** (1) u me duvere. Dopu **andaremu** (2) à ghjucà. **Ai chjamatu** (3) à Santu ? Chì **facia** (4) ? **Sunava** (5) di ghitarra ! **Ete decisu** (6) ciò ch'è no **emu da fà** (7) sta sera ?

In a siconda culonna, metti u/i nome/i di u sugettu. In a terza culonna, scegli trà *prisente, passatu o futuru*.

Verbu	Sugettu	Tempu
1	Anna	prisente
2		
3		
4		
5		
6		
7		

3 Sottuligneghja i verbi.

Sò dece ore di sera è Lisandra hè sempre à travaglià. Dumane, li tuccherà à fà un spostu nant'à l'animali salvatichi di Corsica. Accende l'urdinatore è cerca infurmazione nant'à u situ Educorsica. Dopu e scrive nant'à u so quaternu. Vulia chjamà à Fabio ch'ellu l'aiutessi ma quellu ùn li risponde micca. Civa, si sbrugliarà sola !



4 Sottuligneghja i verbi. ★

Oghje hè a riintrata di ghjinnaghju. Larenzu hà passatu e vacanze di Natale in paese. Conta à Nadià è à Fabio ch'ellu hè andatu à coglie e castagne cù a so mammona. È po a sera, si sò fatti una pulenda cù brocciu è figatelli. Tandu sò affaccati i giovani di u paese è anu cantatu sin'à mezanotte. Dice ch'ellu ne hà da parlà dopu in corsu di corsu.



Sintesi nomi è verbi (da fà in fin' di sesta)

1 Sottuligneghja i verbi in rossu è i nomi in turchinu.

Paulu Santu aiuta u ziu à maneghjà e vele latine di a nave. Si pesa u gregale. U marosulu scuzzula a felucca quand'ella sorte da u portu di Bastia è si direge vers'u nordu. Anu da fà u giru di Capicorsu per andà ind'u golfu di Calvi. Durerà quattru ghjorni u viaghju, andà è vultà.

Bernardu Cesari, *A Galeotta*, © Canopé di Corsica 2021.

Frà i verbi, qualessi sò à l'infinitivi ? :

Frà i nomi, qualessi sò i nomi propii ? :

2 a. Isse parolle in grassu inchjerchja le in rossu quand'elle sò verbi.

b. Inchjerchja le in turchinu quand'elle sò nomi.

c. Sottuligneghja e parolle chì ti parmettenu di ricunnosce i nomi.

I zitelli amparanu un **cantu** chì parla di libertà.

Eiu, ùn **cantu** micca chì sò arghitu.

Laura **parte** tutte e sere à cinque ore.

Cecilia mi dà una **parte** di u so sanduicciu.

O Pè, chjodi issa **porta** chì ci hè u currente.

Karim si **porta** cun ellu un sacchettu di bombò.

O Marì, quand'hè ch'è tù **colli** in paese ?

I **colli** longhi di e giraffe misuranu guasi 3 metri !


I ditarminanti (o determinanti) (da fà in fine di sesta)

I ditarminanti sò parolle chjuche ch'è accumpagnanu à spessu u nome in u gruppu virbale. Di regula, s'accordanu in genaru è in numaru cù quellu nome.

I ditarminanti ch'è no emu vistu sò :

- l'articuli, difiniti (**a** casa, **i** libri) o indifiniti (**una** casa, **un** libru) ;
- i pusissivi, ch'è indettanu a leia d'appartenenza. Si costruiscenu guasi sempre cù un articulu difinitu nanzu : **a me** casa, **i nostri** libri...
- i dimostrativi, ch'è insegnanu è situaghjanu un nome. Sò di trè classe in corsu : **sta** casa, **issu** libru, **quelli** zitelli...

1 Piglia in a valigia i ditarminanti ch'è ponu andà nanz'à sti nomi. ★



..... maestru

..... quaterni

..... scola

..... zitelle

2 Sottuligneghja in u testu tutti i ditarminanti ch'è tù vedi. È po sciacca li in u tavulellu di sottu. ★

Sta mane face u caldu. Larenzu mette u so calzone cortu è si sciacca una barretta in capu. Quella barretta porta un disegnu di Mickey. Tand u zitellu parte à ritruvà i so amichi. In prima trova à Nadià. Quand'ella u vede affacà, a zitella sbotta à ride è li dice : "Cusì goffa issa barrittaccia !".

Articuli difiniti	
Articuli indifiniti	
Ditarminanti pusissivi	
Ditarminanti dimostrativu	

L'aggettivu

- L'aggettivi formanu una classa gramaticale.

- L'aggettivu caratterizighja un nome :

*Carlu hè un omu **sinceru**, a me vittura hè **grisgia**...*

- L'aggettivu s'accorda in genaru è in numaru cù u nome ch'ellu accompagna :

*un zitellu **bravu**, una zitella **brava**, dui zitelli **bravi**, duie zitelle **brave**...*

1 Sottuligneghja l'aggettivi è metti li in leia, cù una frezza, cù i nomi ch'elli cumplettanu.

Prima di parte sta mane, Lisandra si hè messa u so bellu vistitu rossu è un vechju paghjù di scarpi frusti. Piglia dinò u so mantellu novu chì u tempu hè frescu. Davant'à u cullegghju, hè felice di ritruvà i so amichi cari.

2 Fà a leia trà u nome è l'aggettivu chì li currisponde.

E mele •	• bonu
U casgiu •	• vechja
A casa •	• puliti
I piatti •	• salvatiche

3 Fà quattru frase cù i nomi è l'aggettivi di l'eserciziu di nanzu.

..... hè
..... hè
..... sò
..... sò

4 Completa e frase cù st'aggettivi ch'è tù accurdarè : *gattivu – caldu – inchietu - tranquillu - rossu – malatu*. È po metti li in leia, cù una frezza, cù i nomi ch'elli cumplettanu. ★ ★

Larenzu hè Hà una frebba. I so ochji sò Cerca e so calzette
chì si vole pisà. Ma ghjunghje a mamma, chì li dice di stà in lettu.

A punteggiatura

- 1** Torna à scrive u testu mittendu e lettere maiuscole è i punti finali duv'elli accorrenu. Frase ti tocca à furmà ne sette.

Fabio è Lisandra facenu a corsa in corte di ricriaziò u masciu inciampa è casca in tarra li sente u ghjinoghju ma ùn vole micca pienghje davant'à i cumpagni da a so piaga corre un pocu di sangue affacca Larenzu ch'li fascia u ghjinoghju cù u so mandile tandu Lisandra li sciacca tamantu basgiu u visu di Fabio torna subbitu rossu rossu

.....

.....

.....

.....

.....

- 2** Torna à scrive u testu mittendu a punteggiatura duv'elli sò i ◊. Ti tocca à mette 1 puntu d'interrugazione (?), 1 puntu di sciamazione (!), 1 puntu (.), 1 puntu doppiu (:), 1 volta 3 punti di suspensione (...) è 2 virgule (,). Vai dopu à virificà in u manuale (p. 38).

M. Battesti : Quale hè chì sà u nome precisu di un pastore chì alleva e pecure ◊

Lisandra : Eiu a socu ◊ o sgiò prufessori ◊ hè un picuraghju ◊ Pà l'animali ùn ci capiscu tantu ◊ ma pà a lingua socu eiu a tarcana ◊

.....

.....

.....

.....

.....



I pronomi parsunali

I pronomi parsunali sò piccule parolle ch'è insegnanu a parsona. In e nostre lingue, parsona gramaticale ci n'hè trè, ch'è ponu esse singulare o plurale (sei possibilità) :

- i pronomi di prima parsona insegnanu quellu ch'è parla (u lucutore) : **èiu** sò *cuntu*, s'è **no** *tiremu tutti insieme*, à **mè mi** *piace a cicculata...* ;
- i pronomi di siconda parsona insegnanu quellu à quale omu parla (interlucutore) : s'è **tù** *voli*, **ti** *ne vai*, *cansate vi...* ;
- i pronomi di terza parsona insegnanu à calchissia o calcosa ch'è si n'hè dighjà parlatu : *quand'ellu vene*, *ùn li* *parlu più*, *u* *sentu da luntanu...*

I pronomi parsunali, cum'è i nomi ch'elli rimpiazzanu, ponu esse sugetti o ogetti. Si vecanu i tavulelli p. 168/169.

1 Leghji issu picculu contrastu, cù numari daret'à i pronomi parsunali.

Larenzu scontra à Fabio in carrughju. Vedenu à Lisandra ch'è li passa vicinu. A chjamanu.

Fabio : O Lisà, o Lisà ! Auh, ùn mi¹ senti micca.

Larenzu : Chjama la² dinò. Forse ch'ella³ ùn ci⁴ hà micca vistu.

Fabio : Prova tù⁵ ch'è ùn aghju più voci eiu⁶.

Lisandra (ch'è s'avvicina) : Saluta o beddi. Ùn briuneti cusì ch'è vi⁷ aviu vistu.

Larenzu : È s'è no⁸ andessimu à u mare cù issu bellu tempu ?

Empii dopu u tavulellu, fendu una croce in ogni ligna par insignà à quale rimpiazza ogni prunome. I numari sò quelli di u contrastu. ★

	Fabio	Larenzu	Lisandra	Fabio è Larenzu	Fabio, Larenzu è Lisandra
1					
2					
3					
4					
5					
6					
7					
8					

2 Leghji issu picculu contrastu, cù numari daret'à i pronomi parsunali.

Nadià : O Larè, s'è tù¹ mi² dai a to vitturetta rossa, eiu³ ti⁴ dò dece cubì.

Larenzu : È à Lisandra, chì li⁵ voli dà ?

Nadià : À ella⁶, li⁷ daraghju un libru di figurette.

Larenzu : È s'ella⁸ ùn lu⁹ vole micca ?

Nadià : È bè u¹⁰ daraghju à Fabio.

Empii dopu u tavulellu, fendu una croce in ogni cantara par insignà a funzione di ogni prunome. I numari sò quelli di u contrastu. ★ ★

	sugettu	cumplementu
1		
2		
3		
4		
5		
6		
7		
8		
9		
10		

3 Eccu ti une poche di frase, cù numari daret'à i pronomi parsunali. Empii dopu u tavulellu, fendu una croce in ogni ligna par insignà a funzione di e parolle numarate. ★ ★

Sentu ch'ella¹ ghjunghje.

À ella², ùn li³ dicu nulla.

A⁴ vittura nova, babbu a⁵ compra ghjovi.

Quand'è no⁶ parlemu, parlemu à voi⁷.

I⁸ duveri, i⁹ faraghju dumane.

	sugettu	cumplementu	articulu
1			
2			
3			
4			
5			
6			
7			
8			
9			